

四庫全書

集部

欽定四庫全書

集部

古詩紀卷一百三十一

三

詳校官檢討臣德生

侍讀臣孫球覆勘

總校官知縣臣楊懋珩

校對官編修臣吳裕德

謄錄監生臣何茹連

欽定四庫全書

古詩紀卷一百三十一

明 馮惟訥 撰

隋第二

越王侗

字仁謹煬帝之孫元德太子昭之子美姿容性寬厚大業三年立為越王十三年帝幸江

都侗留守東都宇文化及弑逆遂即位  
改元皇泰尋為王世充所奪被醢死

京洛行

樂府此詩乃陳後主楊叛兒曲也  
選詩拾遺作隋越王不知何據

青春上陽月結伴戲京華龍媒玉珂馬鳳軫繡香車水

映臨橋樹風吹夾路花日昏歡宴罷相將歸狹斜

蕭岑

字智遠梁宣帝警之第八子警時封河間王後改為吳郡王位至太尉及琮嗣位自以望重屬

尊頗有不法隋文帝徵入朝拜大將軍封懷義郡公遂留不遣

### 權歌行

桂酒既潺湲輕舟亦乘駕鼓枻何所吟吟我皇唐化容與滄浪中淹留明月夜

王通

字仲淹河汾人既冠西見隋文帝獻太平十二策帝不用東歸其後累徵不起講道於河汾之

上卒弟子諡曰文中子

### 東征歌

文中子世家曰隋仁壽三年文中子西遊長安見文帝奏太平十有二策帝下其議於公卿公卿不悅文中子知謀之不用賦東征之歌而歸帝聞而再徵之不至

我思國家兮遠遊京畿忽逢帝王兮降禮布衣遂懷古  
人之心兮將興太平之基時異事變兮志乖願違吁嗟  
道之不行兮垂翅東歸皇之不斷兮勞身西飛

姚察

吳興人初為南海王國常侍兼尚書駕部郎陳永定中累官至吏部尚書陳亡入隋大為文帝

所重終於東都察至孝有人倫鑒識專志著書白首不倦文帝嘗謂侍臣曰平陳之後惟得此一人

遊明慶寺悵然懷古

欽定四庫全書

卷一百三十一

廣弘明集云陳姚察遇見蕭祭酒書明慶寺  
禪房詩覽之愴然憶此寺仍用蕭韻述懷

地靈居五淨山幽寂四禪月宮臨鏡石花讚繞峯蓮霞  
暉間旂影雲氣合爐煙迴松高偃蓋水瀑細分泉含風  
萬籟響裛露百花鮮宿昔尋真趣結交亟留連山庭出  
蘿靡澗沚濯潺湲因斯事熏習使得息攀緣何言遂雲  
雨懷此悵悠然徒有南登望會逐東流旋

賦得笛

作曲是佳人製名由巧匠鵠絃時莫並鳳管還相向隨

歌響更發逐舞聲彌亮宛轉度雲窻逶迤出黼帳長隨  
畫堂裏承恩無所讓

李德林

字公輔博陵安平人初仕齊至儀同三司及周武帝克齊授內史上士宣帝大漸屬隋高

祖受顧命德林叶贊謀猷禪代之文皆德林辭也初受內史令安平縣公出為湖州刺史

相逢狹路間

天衢號九經冠蓋恒縱橫忽逢懷刺客相尋欲逐名我  
住河陽浦開門望帝城金臺遠猶出玉觀夜恒明筵羞  
大官膳酒釀步兵營懸牀接高士隔帳授諸生流水琴

前韻飛塵歌後輕太子難為弟中子難為兄小子輕財  
利實見陶朱情龍軒照人轉驥馬噓天明入門俱有說  
至道勝金籙出門會親友天官奏德星大婦訓端木中  
婦訓劉靈小婦南山下擊缶和秦箏羣賓莫有戲燈來  
告絕纓

從駕巡遊

詩苑類選作  
許善心者非

大夏堯遺俗汾河漢豫遊今隨龍駕往還屬鴈飛秋天  
行肅輦路日馭翼華輶朝乘六氣辨夕動七星旒谷靜



禽多思風高松易秋遠林才有色遙水漫無流京華佳  
麗所目極與雲浮但覩凌霄觀詎見望仙樓鐫門皆秀  
發駕池盡學優待君草封禪東山觀射牛

從駕還京

至仁文教遠惟聖武功宣太師觀六義諸侯問百年玄  
覽時乘隙訓旅次山川鎮象屯休氣華蓋翼飛煙鼓奏  
千人響旗動七星連峻嶺戈迴日高峯馬煦一作照天姑  
射神遊罷蕭關獵騎旋更待東山上看君巡狩篇

夏日

夏景多煩蒸山水暫追涼  
桐枝覆玉檻荷葉滿銀塘  
輕扇搖明月珍簟拂流黃  
壺盛仙客酒瓶貯帝臺  
漿才人下銅雀侍妓出明光  
歌聲越齊市舞曲冠平陽  
微風動羅帶薄汗染紅粧  
共欣陪宴賞千秋樂未央

入山

登嶺望重關腰珮且鳴環  
天河臨易飲月桂近將攀  
王母西山至夫人南嶽還  
何必陽臺下要待夢容顏

詠松樹

結根生上苑，擢秀邇華池。歲寒無改色，年長有倒枝。露  
自金盤灑，風從玉樹吹。寄言謝霜雪，貞心自不移。

楊素

字處道，弘農華陰人。仕周武帝，以平齊加上開府，封成安縣公。隋高祖為丞相，素深自結納，受

禪後加上柱國，進封越國公。累官右僕射、掌朝政。晉王廣之弑，立素之謀也。大業初，遷尚書令，拜太師，改封楚公，卒。

出塞二首

薛道衡虞世基和詩別見

漠南胡未空，漢將復臨戎。飛狐出塞北，碣石指遼東。冠

軍臨瀚海長平翼大風雲橫虎落陣氣抱龍城虹橫行  
萬里外胡運百年窮兵寢星芒落戰解月輪空嚴譙息  
夜斗駢角罷鳴弓北風嘶朔馬胡霜切塞鴻休明大道  
暨幽荒日月同方就長安邸來謁建章宮

漢虜未和親憂國不憂身握手河梁上窮涯北海濱據  
鞍獨懷古慷慨感良臣歷覽多舊迹風日慘愁人荒塞  
空千里孤城絕四鄰樹寒偏易古草衰恒不春交河明  
月夜陰山苦霧辰鴈飛南入漢水流西咽秦風霜久行

役河朔備艱辛薄暮邊聲起空飛胡騎塵

山齋獨坐贈薛內史二首

居山四望阻風雲竟朝夕深溪橫古樹空巖卧幽石日出遠岫明鳥散空林寂蘭庭動幽氣竹室生虛白落花入戶飛細草當堦積桂酒徒盈樽故人不在席日一作薄

暮山之幽臨風望羽客

巖壑澄清景景清巖壑深白雲飛暮色綠水激清音澗戶散餘彩山牕凝宿陰花草共榮映樹石相陵臨獨坐

對陳榻無客有鳴琴寂寂幽山裏誰知無悶心

贈薛內史

耿耿不能寐京洛久離羣橫琴還獨坐停杯遂待君待  
君春草歇獨坐秋風發朝朝唯落花夜夜空明月明月  
徒流光落花空自芳別離望南浦相思在漢陽漢陽隔  
隴岑南浦遠桂林山川雖未遠無由得寄音

贈薛播州十四首

北史曰素嘗以五言詩七百字贈播州刺史薛道衡詞氣頽拔風韻秀上為一時盛作未幾而卒道

衡曰人之將死其

言也善若是乎

在昔天地閉品物屬屯蒙和平替王道哀怨結人風麟

傷世已季龍戰道將窮亂海飛羣水

一作亂流  
飛海若

貫日引

長

一作  
白

虹干戈異革命揖讓非至公

兩河定寶鼎八水域神州函關絕無路京洛化為丘漳

溢爾連沼涇渭余別流生郊滿戎馬涉路起風牛班荆

疑莫遇贈縞竟無由

五緯連珠聚千載濁河清金亡潛虎質閨盡自蛙聲聖

期伊旦暮天祿啓炎精霧生三日重星飛五老輕禋宗  
答上帝改物創羣生

道昏雖已朗政故猶未新剗舟洹水濟

一作際

結網大川

濱出遊迎釣叟入夢訪幽人植林雖各樹開榮豈異春  
相逢一時泰共幸百年身

有帛賁丘園生芻自幽谷塵芳金馬路瀾清鳳池澳零  
露既垂光清風復流穆傾蓋如舊知彈冠豈新沐利心  
金各斷芬言蘭共馥



自余歷端揆緝熙慝時彥及爾陪帷幄出納先天睠高  
調發清音緝藻流餘絢或如彼金玉歲暮無凋變余松  
待爾心爾筠留我箭

荏苒積歲時契濶同遊處閭闔既趨朝承明還宴語上  
林陪羽獵甘泉侍清曙迎風含暑氣飛雨淒寒序相顧  
惜光陰留情共延一作佇

滔滔彼江漢實為南國紀作牧求明德若人應斯美高  
卧未褰帷飛聲已千里還望白雲天日暮秋風起峴山

君儻遊淚落應無已

漢陰政已成  
嶺表人猶蠹  
彈冠北方新  
還珠摠如故  
楚人結去思  
越俗歌來暮  
陽烏疑作鳥尚歸飛  
別鶴還迴顧

君見南枝巢應思  
北風路

北風吹故林  
秋聲不可聽  
鴈飛窮海寒  
鶴唳霜臯淨  
含毫心未傳  
聞音路猶曩  
惟有孤城月  
徘徊獨臨映  
弔影余自憐  
安知我疲病

養病願歸閭  
居榮在知足  
栖遲茂陵下  
優游滄海曲  
古

人情可見今人遵路躅荒居接野窮心物俱非俗桂樹  
芳叢生山幽竟何欲

所欲棲一枝稟分豐諸已園樹避鳴蟬山梁遇雌雉野  
陰冒叢灌幽氣含蘭芷悲哉暮秋別春草復萋矣鳴琴  
久不聞屬聽空流水

秋水魚遊日春樹鳥鳴時濠梁暮共往幽谷有相思千  
里悲無駕一見杳難期山河散瓊蘂庭樹下丹滋物華  
不相待遲暮有餘悲

銜悲向南浦寒色黯沈沈風起洞庭險煙生雲夢深獨  
飛時慕侶寡和乍孤音木落悲時暮時暮感離心離心  
多苦調詎假雍門琴

何妥

字栖鳳西城人少機敏以技巧事梁湘東王江陵陷周武帝尤重之隋高祖受禪除國子博士

奉詔考正鍾律  
累遷國子祭酒

門有車馬客行

英華作  
何遜

門前車馬客言是故鄉來故鄉有書信縱橫印檢開開  
書看未極行客屢相識借問故鄉人潺湲淚不息上言

離別久下道望應歸寸心將夜鵲相逐向南飛

入塞

桃林千里險候騎亂紛紛問此將何事嫖姚封冠軍回  
旌引流電歸蓋轉行雲待任蒼龍傑方當論次勲

長安道

長安狹斜路縱橫四達分車輪鳴鳳轄箭服耀魚文五  
陵多任俠輕騎自連羣少年皆重氣誰識故將軍

鳳轄用霍

光事

昭君詞

英華作  
何遜

昔聞別鶴弄已自軫離情今來昭君曲還悲秋草并

奉敕於太常寺脩正古樂

大樂遺鐘鼓至樂貴忘情俗久淳和變年深禮教生  
嶰谷調孤管崙山學鳳鳴浮雲成舞曲白雪作歌名  
聞詩六義辨觀漏八風平肅穆皇威暢淪連河水清  
鈞天動絲竹括地響鐃鉦盡美無韶護盛德總咸英  
寥亮鳬鐘徹飄揚翟羽輕小臣屬千載時幸預簪纓  
行欣負蒼璧

衢壇聽九成

樂部曹觀樂

東海餘風大陶唐遺思深何如觀徧舞奏鼓間擬金清  
管調絲竹朱絃韻雅琴八行陳樹羽六德審知音至道  
兼韶濩充庭總韎任高天度流火落日廣城陰百神諧  
景福萬國仰君臨大樂非鐘鼓且用戒民心

劉臻

字宣摯沛國相人父顯梁尋陽太守臻舉秀才為邵陵王東閣祭酒元帝時遷中書舍人後仕

周為露門學士大都督隋高祖受禪  
進位儀同三司皇太子勇引為學士

河邊枯樹

奇樹臨芳渚，半死若龍門。  
疾風摧勁葉，沙岸毀盤根。  
將軍猶未坐，匠石不曾論。  
無復凌雲勢，空餘激浪痕。  
可嗟摧折盡，詎得上河源。

賀若弼

字輔伯，河南雒陽人。仕齊、周，歷官壽州刺史。隋文帝受禪，陰有平江南之志，高頴薦弼有

文武才幹，拜吳州總管。平陳後，加上柱國，進爵宋國公。煬帝時，以怨望坐誅。

遺源雄

隋書本傳曰：隋文帝拜弼為吳州總管，委以平陳之事。弼欣然以為己任，與壽州總管源雄並為重。



鎮朔遺

雄詩曰

交河驃騎幕合浦伏波營勿使麒麟上無我二人名

史萬歲

京兆杜陵人少英武善騎射周武帝時釋褐  
侍任上士隋高祖時屢立戰功進位柱國楊

素害其功激怒  
高祖以事殺之

### 石城山

石城門峻誰開闢更鼓悟聞風落石界天自嶺勝金湯  
鎮壓西南天半壁

古詩紀卷一百三十一

欽定四庫全書

古詩紀卷一百三十二

明 馮惟訥 撰

隋第三

盧思道

字子行范陽人聰明俊辨才學兼著齊天保中解褐直中書省待詔文林館周武帝平齊授儀同三司隋高祖為丞相遷武陽太守開皇間為散騎侍郎

樂府

有所思

長門與長信憂思並難任洞房明月下空庭綠草深怨

歌裁潔

一作  
紉

素能賦受黃金復聞隔湘水猶言限桂林

淒淒日已暮誰見此時心

日出東南隅行

初月正如鉤懸光入綺樓中有可憐妾如恨亦如羞深  
情出艷語密意滿橫眸楚腰寧且細孫眉本未愁青玉  
勿當取雙銀詎可一作  
肯留會待東方騎遥居最上頭

權歌行

秋江見底清越女復傾城方舟共採摘最得可憐名落

花流寶珥微吹動香纓帶垂連理濕櫂舉木蘭輕順風  
一作避人傳細語因波寄遠情誰能結錦纜薄暮隱長汀

美女篇

京洛多妖艷餘香愛物華俱臨鄧渠  
一作梁塏水共採鄴園

花時搖五明扇聊駐七香車情疎看笑淺嬌深眄欲斜  
微津染長黛新溜濕輕紗莫言人未解隨君獨問家

升天行

尋師得道訣輕舉厭人羣玉山候王母珠庭謁老君煎

為返魂藥刻作長生文飛策乘流電彫軒曳彩

一作雲

玄洲望不極赤野眺無垠金樓旦蹇嵯玉樹曉氛氲擁  
琴遙可聽吹笙遠詎聞不學蜉蝣子生死何紛紛

神仙篇

浮生厭危促名岳共招携雲軒遊紫府風駟上丹梯時  
見遼東鶴屢聽淮南雞玉英持作寶瓊實採成蹊飛策  
揚輕電懸旌耀彩霓瑞銀光似燭靈石髓如泥寥廓鸞  
山右超越鳳洲西一九應五色持此救人迷

## 河曲遊

魏文帝與吳質書曰  
時駕而遊北遵河曲

鄴下盛風流河曲有名遊應徐託後乘車馬踐芳洲  
丰茸雞樹密遙裔鶴煙稠日上疑高蓋雲起類重樓  
金羈自沃若蘭棹成夷猶懸匏匏動清吹采菱轉艷謳  
還珂響金埒歸袂拂銅溝惟畏三春晚勿言千載憂

## 城南隅讌

曹子建贈丁翼詩曰吾  
與二三子曲讌此城隅

城南氣初新才王邀故人輕盈雲映日流亂鳥啼春花  
飛北寺道絃散南漳濱舞動淮南袖歌揚齊后塵駢鑣  
歇夜馬接軫跟歸輪公孫飲彌月平原譙浹旬即是消  
聲地何須遠避秦

蜀國弦

西蜀稱天府由來擅沃饒雲浮玉壘夕日映錦城朝南  
尋九折路東上七星橋琴心若易解令客豈難要

採蓮曲



曲浦戲妖姬，輕盈不自持。  
擎荷愛圓水，折藕弄長絲。  
佩動裙風入，妝銷粉汗滋。  
菱歌惜不唱，須待暝歸時。

### 從軍行

朔方烽火照甘泉，長安飛將出祁連。  
犀渠玉劍良家子，白馬金羈俠少年。  
平明偃月屯右地，薄暮魚麗逐左賢。  
谷中石虎經銜箭，山上金人曾祭天。  
天涯一去無窮已，薊門迢遞三千里。  
朝見馬嶺黃沙合，夕望龍城陣雲起。  
庭中奇樹已堪攀，塞外征人殊未還。  
白雪初下天山外，

浮雲直上五雲間  
關山萬里不可越  
誰能坐對芳菲月  
流水本自斷人腸  
堅冰舊來傷馬骨  
邊庭節物與華異  
冬霰秋霜春不歇  
長風蕭蕭渡水來  
歸鴈連連映天沒  
從軍行軍行萬里出  
龍庭單于渭橋今已  
拜將軍何處覓功名

詩

駕出園丘

開年簡時日上辛  
稱天吉平曉禁門  
開隱隱乘輿出乘

輿出九重金根御六龍章移千乘動旆舉百神從黃麾  
引朱節靈鼓應華鐘神歌已相續神光復相燭風中颺  
紫煙壇上埋蒼玉

贈李若

初發清漳浦春草正萋萋今留素滌曲夏木已成蹊塵  
起星橋外日落寶壇西庭空野煙合巢深夕羽迷短歌  
雖製素長吟當執珪寄語當窻婦非關惜馬蹄

贈別司馬幼之南聘

故交忽千里輜車蒞遠盟幽人重離別握手送征行晚  
霞浮極浦落景照長亭拂霧揚龍節乘風遡鳥旌楚山  
百重映吳江萬仞清夏雲樓閣起秋濤帷蓋生陸侯持  
寶劍終子繫長纓前修亦何遠君其勗令名

贈劉儀同西聘

開邛昔柔遠賓越盡招攜豈若馳天使玉節撫遺黎五  
祠臨渭北雙嶺帶嶠西故關看金馬餘壇聽寶雞垂絲  
被柳陌落錦覆桃蹊分袂俄易慘離思實難齋極野雲

峯合遙嶂日輪低塵暗前旌沒風長後騎嘶灞陵行可  
望函谷久無泥須君勞旋罷春草共萋萋

遊梁城

楊鑣歷汴浦迴扈

一作  
鞞

入梁墟漢藩文雅地清塵暖有

餘賓遊多任俠臺苑盛簪裾歎息徐公劍悲涼鄒子書  
亭臯落照盡原野沍寒初鳥散空城夕煙銷古樹疎東  
越嚴子陵西蜀馬相如脩名竊所慕長謠獨課虛

從駕經大慈照寺

北齊  
時作

玄風冠東戶內範軼西陵大川開寶匣福地下金繩繡  
栢高可映畫拱疊相承日馭非難假雲師本易憑陽室  
疑停燧陰軒類鑿冰迴題飛星沒長楸宿露凝旌門曙  
光轉輦道夕雲蒸山祇効靈物水若薦休徵薄命叨恩  
紀微軀竊自陵優游徒可恃周賚永難勝

春夕經行留侯墓

少小期黃石晚年遊赤松應成羽人去何忽掩高封疎  
蕪枕絕野邈迤帶斜峯墳荒隧草沒碑碎石苔濃狙秦

懷猛氣師漢挺柔容盛烈芳千祀深泉閉九重夕風吟  
宰樹遲光落下春遂令懷古客揮淚獨無從

上巳禊飲

山泉好風日

一作景

城市厭囂塵聊持一樽酒共尋千里

春餘光下幽桂夕吹舞青蘋何言出關後重有入林人

夜聞鄰妓

拾遺作  
觀妓

倡樓對三道吹臺臨九重笙隨山上鶴笛奏水中龍怨  
歌聲易斷妙舞態難逢誰能暫留客解珮一相從

賦得珠簾

鑑帷明欲斂，照檻色將晨。  
可憐疎復密，隱映當窻人。  
浮清帶遠吹，含光動細塵。  
落花時屢拂，會待玉階春。

彭城王挽歌

旭旦禁門開，隱隱靈輿發。  
纔看鳳樓迴，稍視龍山沒。  
猶陳五營騎，尚聚三河卒。  
容衛儼未一作來歸，空山照秋月。

樂平長公主挽歌

粧樓對馳道，吹臺臨景舍。  
風入上春朝，月滿涼秋夜。  
未



言歌笑畢已覺生榮謝何時洛水湄芝田解龍駕

後園宴

常聞崑閬有神仙雲冠羽佩得長年秋夕風動三珠樹  
春朝露濕九芝田不如鄴城佳麗所玉樓銀閣與天連  
太液回波千丈映上林花樹百枝然流風續洛渚行雲  
在南楚可憐白水神可念青樓女便妍不羞澁妖艷工  
言語池苑正芳菲得戲不知歸媚眼臨歌扇嬌香出舞  
衣纖腰如欲斷側髻似能飛南樓日已暮長簷鳥應度

竹殿遙聞鳳管聲  
虹橋別有羊車路  
攜手傍花叢徐步  
入房櫳欲眠衣先解  
半醉臉逾紅日日相  
看轉難厭千嬌萬態  
不知窮欲知妾心無  
劇已明月流光滿帳  
中

聽鳴蟬篇

此齊顏之推  
同賦已見

北史本傳曰周武帝平齊授思道儀同三司追赴  
長安與同輩陽休之等數人作聽鳴蟬篇思道所  
為詞意清切為時人所重新野  
庚信徧覽諸同作者而歎美之

聽鳴蟬此聽悲無極  
羣嘶玉樹裏迴噪金  
門

一作堤

側長

風送晚聲清露供朝  
食晚風朝露實多宜  
秋日高鳴獨

見知輕身蔽數葉哀鳴抱一枝流亂罷還續酸傷合更  
離暫聽別人心卽斷纔聞客子淚先垂故鄉已超忽空  
庭正蕪沒一夕復一朝坐見涼秋月河流帶地從來嶮  
峭路干天不可越紅塵早敝陸生衣明鏡空悲潘掾髮  
長安城裏帝王州鳴鐘列鼎自相求西望漸臺臨太液  
東瞻甲觀距龍樓說客恒持小冠出越使常懷寶劍遊  
學仙未成便尚主尋源不見已封侯富貴功名本多豫  
繁華輕薄盡無憂詎念嫖姚嗟木梗誰憶田單

一作  
蘭皋倦

土牛歸去來青山下秋菊離離日堪把獨焚枯魚宴林  
野終成獨校子雲書何如還驅少游馬

李孝貞

字元操入隋為犯廟諱遂以字稱趙郡栢鄉人少好學能屬文在齊歷官黃門侍郎周武

帝平齊轉吏部下大夫開皇初歷蒙州刺史徵拜內史叅典文翰出為金州刺史

巫山高

荆門對巫峽雲夢邇陽臺燎火如奔電墜石似驚雷天  
寒秋水急風靜夜急猿哀枕席無由薦朝雲徒去來

鳴鴈行

此詩本詠雀樂府題曰鳴鴈行或有誤也

聽琴旋蔡子張羅避翟公夕宿寒林上朝飛空井中既  
並玄雲曲復變海魚風一報黃花惠還遊萬歲宮

奉和從叔光祿愔元日早朝

銅渾變春節玉律動年灰曖曖城霞旦隱隱禁門開衆  
靈湊仙府百神朝帝臺葉令雙鳧至梁王駟馬來戈鋌  
映林闕歌管沸塵埃保章望瑞氣尚書滅火災冠冕多  
秀士簪裾饒上才誰憐張仲蔚日暮返蒿萊

聽百舌鳥

煙銷上路靜漏盡禁門通好鳥從西苑流響入南宮間  
關既多緒變轉復無窮調驚時斷絕音繁有異同飲啄  
歸承露飛鳴上別風未避王孫彈寧畏虎賁弓石渠皆  
學府麟閣悉文雄不恡青泥印時尋白社中

酬蕭侍中春園聽妓

微雨散芳菲中園照落暉紅樹搖歌扇綠珠飄舞衣繁  
弦調對酒雜引動思歸愁人當此夕羞見落花飛

園中雜詠橘樹

嘉樹出巫陰分根徙上林白華如散雪朱實似懸金布  
影臨丹地飛香度玉岑自有凌冬質能守歲寒心

古詩紀卷一百三十二



欽定四庫全書

古詩紀卷一百三十三

明 馮惟訥 撰

隋第四

薛道衡

字玄卿河東汾陰人少孤專精好學甚著才名為齊尚書左外兵郎齊亡周武引用為御

史二命士隋高祖受禪除內史累遷上儀同三司出檢校襄州煬帝嗣位道衡上文皇帝頌帝覽之不悅尋以論時政見害

樂府

出塞二首

和楊素○  
以下五言

高秋白露團上將出長安塵沙塞下暗風月隴頭寒轉  
蓬隨馬足飛霜落劍端凝雲迷代郡流水凍桑乾烽微  
桔槔遠橋峻轆轤難從軍多惡少召募盡材官伏堤時  
卧鼓疑兵乍解鞍柳一作龍城擒冒頓長坂納呼韓受降  
今更築燕然已重刊還嗤傅介子辛苦刺樓蘭

邊庭烽火驚挿羽夜徵兵少昊騰金氣文昌動將星長  
驅鞬汗北直指夫人城絕漠三秋暮窮陰萬里生寒夜  
哀笛曲霜天斷鴈聲連旗下鹿塞疊鼓向龍庭妖雲隆

虜陣暈月遶胡營左賢皆頓顙單于已繫纓綈馬登玄  
闕鉤鯤臨北溟當知霍驃騎高第起西京

昭君辭

我本良家子充選入椒庭不蒙女史進更失畫師情蛾  
眉非本質蟬鬢改真形專由妾命薄誤使君恩輕啼霑  
渭橋路歎別長安城夜依寒草宿朝逐轉蓬征卻望關  
山迴前瞻沙漠平胡風帶秋月嘶馬雜笳聲毛裘易羅  
綺氍毹代金屏自知蓮臉歇羞看菱鏡明釵落終應棄

髻解不須縈何用單于重詎假閼氏名駃騠聊彊食筒

一作

酒未能傾心隨故鄉斷愁逐塞雲生漢宮如有憶

為視旄頭星

昔昔鹽

垂柳覆金堤  
靡蕪葉復齊  
水溢芙蓉沼  
花飛桃李蹊  
採桑秦氏女  
織錦竇家妻  
關山別蕩子  
風月守空閨  
恒斂千金笑  
長垂雙玉啼  
盤龍隨鏡隱  
彩鳳逐帷低  
飛翬同夜鵲  
倦寢憶晨雞  
暗牖懸蛛網  
空梁落燕泥  
前年過代

北今歲往遼西一去無消息那能惜馬蹄

豫章行 七言

江南地遠接閩甌山東英妙屢經遊  
前瞻疊嶂千重阻却帶驚湍萬里流  
楓葉朝飛向京洛文魚夜過歷吳洲  
君行速度茱萸嶺妾住長依明月樓  
樓中愁思不開頻始復臨窻望早春  
鴛鴦水上萍初合鳴鶴園中花併新  
空憶常時角枕處無復前日畫眉人  
照骨金環誰用許見膽明鏡自生塵  
蕩子從來好留滯况復關山遠迢遞

當學織女嫁牽牛莫作姮娥叛夫壻偏訝思君無限極  
欲罷欲忘還復憶願作王母三青鳥飛去飛來傳消息  
豐城雙劍昔曾離經年累月復相隨不畏將軍成久別  
只恐封侯心更移

詩

從駕幸晉陽

以下  
五言

省方遵往冊遊豫叶前經金吾朝戒道校尉晚巡營重  
轡下飛騎絕浦渡連旌澗水寒逾咽松風遠更清方觀

翠華返簪筆上云亭

奉和月夜聽軍樂應詔

旌門臨古堞，徼道度深隍。  
月冷疑秋夜，山寒落夏霜。  
遙空澄暮色，清景散餘光。  
笳聲喧隴水，鼓曲噪漁陽。  
沈鬱興神思，眺聽發天章。  
嵩岱終難學，丘陵徒自強。

奉和臨渭源應詔

玄功復禹迹，至德去湯羅。  
玉關亭障遠，金方水石多。  
八川茲一態，萬里導長波。  
驚流注陸海，激浪象天河。

三輔黃圖

云渭水貫都象天河

鸞旗歷巖谷龍穴暫經過西老陪遊宴南風

起詠歌庶品蒙仁澤生靈穆太和微臣惜暮景願駐魯

陽戈

秋日遊昆明池

江總元行恭皆有此詩

灞陵因靜退靈沼暫徘徊新船木蘭檝舊宇豫章材荷  
心宜露泣竹徑重風來魚潛疑刻石沙暗似沈灰琴逢  
鶴欲舞酒遇菊花開羈心與秋興陶然寄一杯

敬酬楊僕射山齋獨坐



相望山河近相思朝夕勞龍門竹箭急華岳蓮花高岳  
高嶂重疊鳥道風煙接遙原樹若薺遠水舟如葉葉舟  
旦旦浮驚波夜夜流露寒洲渚白月冷函關秋秋夜清  
風發彈琴即鑑月雖非莊舄歌吟詠常思越

楊素封  
越國公

### 重酬楊僕射山亭

寂寂無與晤朝端去總戎空庭聊步月閒坐獨臨風臨  
風時太息步月山泉側朝朝散霞彩暮暮澄秋色秋色  
遍臯蘭霞彩落雲端吹旌朔氣冷照劍日光寒光寒塞

草平氣冷咽笳聲將軍獻凱入藹藹風雲生

入郴江

仗節遵嚴會揚舲沂急流征塗非白馬水勢類黃牛跳  
波鳴石磧濺沫擁沙洲岸迴槎倒轉灘長船却浮緣崖  
頻斷挽挂壁屢移鈎還憶青絲騎東方來上頭

渡北河

連旌映淑浦疊鼓拂沙

一作河

洲桃花長新浪竹箭下奔

流塞雲臨遠艦胡風入陣樓劍拔蛟將出驂驚黿欲浮

鴈書終立效燕相果封侯勿恨關河遠且寬邊地愁

和許給事善心戲場轉韻

京洛重新年復屬月輪圓雲間壁獨轉空裏鏡孤懸萬  
方皆集會百戲盡來前臨衢車不絕夾道閣相連驚鴻  
出洛水翔鶴下伊川艷質迴風雪笙歌韻管絃佳麗儼  
成行相攜入戲場衣類何平叔人同張子房高高城裏  
髻我我樓上粧羅裙飛孔雀綺帶垂鴛鴦月映班姬扇  
風飄韓壽香竟夕魚負燈徹夜龍銜燭歡笑無窮已歌

詠

一作吹

還相續羌笛隴頭吟胡舞龜茲曲假面飾金銀

盛服搖珠玉宵深戲未闌競為人所難卧驅飛玉勒立

騎轉銀鞍縱橫既躍劍揮霍復跳丸抑揚百獸舞盤跚

五禽戲狻猊弄斑足巨象垂長鼻青羊跪復跳白馬迴

旋騎

一作駛

忽覩羅浮起俄看鬱昌至峯嶺既崔嵬林叢

亦青翠麋鹿

一作麋鹿

下騰倚猴猿或蹲跂金徒列舊刻玉

律動新灰甲萸垂陌柳殘花散苑梅繁星漸寥落斜月

尚徘徊王孫猶勞戲公子未歸來共酌瓊酥酒同傾鸚

鷄杯普天逢聖日兆庶喜康哉

展敬上鳳林寺

淨土連幽谷寶塔對危峯  
林棲丹穴鳳地邇白沙龍  
獨巖樓迴出複道閣相重  
洞開朝霧斂石濕曉雲濃  
高篠低雲葢風枝響和鐘  
簷陰翻細柳澗影落長松  
珠桂浮明月蓮座吐芙蓉  
隱淪徒有意心迹未相從

從駕天池應詔

上聖家寰宇威畧振邊陲  
八維窮眺覽千里曳旌

一作轉

旗駕黿臨碧海控驥踐瑤池曲浦騰遠霧深浪駭鯨螭  
梅夏應教

長廊連紫殿細雨應黃梅浮雲半

拾遺作映

空上清吹隔池

來集鳳桐花散勝龜蓮葉開幸逢為善樂頻降濟時才

人日思歸

入春纔七日離家已二年人歸落鴈後思發在花前

夏晚

流火稍西傾夕影遍曾城高天澄遠色秋氣入蟬聲

歲窮應教

故年隨夜盡  
初春逐曉生  
方驗從軍樂  
飲至入西京

詠苔紙

昔時應春色  
引淥泛清流  
今來承玉管  
布字改銀鈎

魏澹

字彥深鉅鹿下曲陽人博涉經史文詞瞻逸齊時為中書舍人周武平齊授納言中士隋高祖

受禪為散騎侍郎太

子舍人遷著作郎

初夏應詔

雖度芳春節  
物色尚餘華  
出簾飛小燕  
映戶落殘花  
舞

衫飄細縠歌扇掩輕紗蘭房本宜夜不畏日光斜

詠階前萱草

綠草正含芳  
靄靡映前堂  
帶心花欲發  
依籠葉已長  
雲度時無影  
風來乍有香  
橫得忘憂號  
余憂遂不忘

詠石榴

分根金谷裏  
移植廣庭中  
新枝含淺綠  
晚萼散輕紅  
影入環階水  
香隨度隙風  
路遠無由寄  
徒念春閨空

園樹有巢鵲戲以詠之



畏玉心常駭填河力已窮夜飛還繞樹朝鳴且向風  
關  
來寧自伐識歲不論功早晚時應至輕舉一排空

詠桐

本求裁作瑟何用削成珪願寄華庭裏枝橫待鳳棲

辛德源

字孝基隴西狄道人仕北齊歷散騎侍郎遷  
郎中齊滅仕周隋高祖受禪不得調隱於林

慮山中著幽居賦以自寄刺史崔夢武奏之謫  
從軍討南寧還牛弘薦脩國史轉諮議叅軍卒

短歌行

馳射罷金溝戲笑上雲樓少妻鳴趙瑟侍妓轉吳謳杯

度浮香滿扇舉細塵浮星河耿涼夜飛月艷新秋忽念  
奔駒促彌欣執燭遊

白馬篇

任俠重芳辰相從競逐春金羈絡赭汗紫縷

一作陌

應紅

塵寶劍提

一作橫

三尺雕弓韜六鈞鳴珂蹀細柳飛蓋出

宜春遙見浮光

一作雲

發懸知上頭人

霹靂引

出地聲初奮乘乾威更作雲銜天笑明雨帶星精落碎

枕神無擾震楹書自若側聞吟白虎遠見飛玄鶴

猗蘭操

奏事傳青閣拂除乃陶嘉散條凝露彩含芳映日華已  
知香若麝無怨直如麻不學芙蓉草空作眼中花

成連

列子曰伯牙  
學琴於成連

征夫從遠役歸望絕雲端簑笠城踰壞霜落梅初寒雪  
夜愁峰濕冰朝飲馬難寂寂長安信誰念客衣單

芙蓉花

洛神挺凝素文君拂艷紅麗質徒相比鮮彩兩難同光  
臨照波日香隨出岸風涉江良自遠託意在無窮

浮遊花

樂府無名列芙蓉花之後左克明作辛德源

窻中斜日照池上落花浮若畏春風晚當思秉燭遊

東飛伯勞歌

合歡芳樹連理枝荆王神女乍相隨誰家妖艷蕩輕舟  
含嬌轉眄騁風流犀棹蘭橈翠羽蓋雲羅霧縠蓮花帶  
女兒年幾十六七玉面新妝映朝日落花從風俄度春

空留可憐何處新

星名

邊侵昏高柳燿火照離宮明堂發三令勾陳集五戎素  
扇一作羽麾全月朱旗引半虹虎落驚氛斂龍城宿霧通

擊鐘張大樂置酒宴羣公關山無復阻車書方大同

柳詒

字顧言襄陽人初仕梁梁亡入隋為晉王諮議參軍仁壽初引為東宮學士詒俊辯嗜酒言雜

俳諧為太子之所親狎煬帝嗣位拜秘書監從幸江都卒

奉和晚日揚子江應制

詰旦金鏡發驂駕出城闐鮮雲臨葆蓋細草藉斑輪千  
里煙霞色四望江山春梅風吹落藥酒雨減輕塵日斜  
歡未畢睿想良非一風生疊浪起霧卷孤帆出挾藻麗  
繁星高論光朝日空美鄒枚侶

一作終謝淵雲筆

奉和晚日揚子江應教

大江都會所長洲有舊名西流控岷蜀東汎通蓬瀛未  
覩纖羅動先聽遠濤聲空濛雲色晦浹疊浪華生欲知  
暮雨歇當觀飛旆輕

奉和春日臨渭水應令

飲馬投錢岸解釣剖璜津風絲曳香餌覆杯懷昔人

詠死牛

一朝辭紺幘千里別黃河對衣徒下泣扣角詎聞歌

陽春歌

春鳥一轉有千聲春花一叢千種名旅人無語坐

一作出

簷楹思鄉懷土志難平唯當文共酒暫與興相迎

牛弘

字里仁安定鶡觚人開皇初授秘書監封奇章郡公後進位右光祿大夫大業六年從幸卒于

江都

奉和冬至乾陽殿受朝應詔

恭已臨萬寓宸居御八埏作貢菁茅集來朝圭黻連司儀三揖盛掌禮九賓虔重欄映如璧複殿繞非煙

許善心

字務本高陽北新城人起家新安王法曹陳

伐陳留紮宿館聞陳亡哀服號哭詔就館拜官善心伏泣受命高祖顧左右曰我平陳國唯獲此人遷虞部侍郎為秘書攝太常預議定禮樂及煬帝為宇文化及所弑善心以不屈遇害

奉和賜詩



帝道屬昇平天文預觀象茲生荷化育博施多含養正  
始振皇風端居留眷想夕拜叅近侍朝恩濫弘獎溫樹  
貴不言克艱庶無爽

奉和還京師

重光闡帝圖肆覲荷來蘇卜洛連新邑因泰還舊都雷  
警三宸衛星陳七萃驅從風折鳳羽曜日拖魚鬚憲章  
殫禮樂容服脩車徒迴鑾入鄴鎬從蹕度汾榆冉冉年  
和變遲遲節物徂餘花照玉李細葉剪珪梧朝夕萬國

湊海會百川輸微生逢大造倏忽改榮枯

於太常寺聽陳國蔡子元所校正聲樂

維陽成禮樂治定昔君臨克庭觀樹羽之


一作上

帝仰從

金既因鐘石變將隨河海沈湛露廢還序承風絕復尋  
衮章無舊迹韶夏有餘音澤竭英莖散人遺憂思深悲  
來未減瑟淚下正聞琴詎似文侯睡聊同微子吟鐘奏  
殊南北商聲異古今獨有延州聽應知亡國音

奉和冬至乾陽殿受朝應詔

森森羅陞衛噦噦鏘璫璫禮殫五瑞輯樂闋九功成闕



古詩紀卷一百三十三

欽定四庫全書

集部

古詩紀卷一百三十六

四三

詳校官檢討臣德生

侍讀臣孫球覆勘

總校官知縣臣楊懋珩

校對官編修臣吳裕德

謄錄監生臣何茹連

欽定四庫全書

古詩紀卷一百三十四

明 馮惟訥 撰

隋第五

崔仲方

字不齊博陵安平人仕周為司玉大夫武帝下齊城授儀同進爵范陽縣侯隋受禪位上

開府煬帝時進位大將軍禮部尚書出為上郡信都二郡太守

奉和周趙王詠石

玉繩隨月落金碑映日鮮  
入江疑濯錦出峽似開蓮  
文馬河西瑞兵符濟北篇  
會逐靈槎上還歸天漢邊

小山

英華作  
神仙

崑丘本難陟軒臺不易朝還往麟洲上時聽鳳凰簫霞  
觀文犀簟香林碧玉條且學燒丹甌何假摘靈桃

夜作巫山

荆門秋水急巫峽斷雲輕若為教月夜長短聽猿聲

于仲文

字次武起家為周趙王屬安固太守隋高祖  
受禪教擊胡有功拜太子右衛率煬帝時遷

大將軍遠東之敗諸將皆委  
罪仲文帝怒繫之因發病卒

侍宴東宮應令

銅樓充震位銀榜集嘉賓青宮列紺幃紫陌結朱輪絃  
調寶瑟曲歌動畫梁塵金卮傾斗酒瓊筵列八珍花驚  
度翠羽萍散躍潁鱗承恩叨並作扣一作和寂繞陽春

答譙王

按北史譙孝王  
儉周文帝子也

梧臺開廣宴竹苑列英賢景差方入楚樂毅始遊燕折  
角揮談柄重席吐言泉武騎初擣翰文學正題鞭玉徽  
調綠綺璧散沈青田晚霞澹遠岫落景藻長川未陪東  
閣賞獨詠西園篇



虞世基

字茂世，會稽餘姚人。博學，有高才。仕陳，歷尚書左丞。入隋，為通直郎直內史省。煬帝即位，

顧遇彌隆。帝遊幸江都時，天下大亂，世基雖居近侍，唯諾取容。郡縣兵敗，不敢以聞。及宇文化及弑

逆世基

亦遇害

出塞二首

和楊素

窮秋塞草腓，塞外胡塵飛。徵兵廣武至，候騎陰山歸。廟堂千里策，將軍百戰威。轅門臨玉帳，大旆指金微。摧朽無勁敵，應變有先機。銜枚壓曉陣，卷甲解朝圍。瀚海波瀾靜，王庭氛霧晞。鼓鼙嚴朔氣，原野噎寒暉。暉動庸震邊。

服歌吹入京畿待拜長平坂鳴騶入禮闈

上將三畧遠元戎九命尊緬懷古人節思酬明主恩山

西多勇氣塞北有遊蒐揚桴度

一作上

隴坂勒騎上

一作下

平原誓將絕沙漠悠然去玉門輕齋不遑舍驚策驚戎  
軒懍懍邊風急蕭蕭征馬煩雪暗天山道冰塞交河源  
霧烽黯無色霜旗凍不翻耿介倚長劍日落風塵昏

奉和幸江都應詔

藝文作虞世基  
初學作虞茂

巡遊光帝典征吉乃先天澤國翔宸駕水府泛樓船七

萃繁長薄三翼亘通川夙興大昕始求衣昧旦前澄瀾  
浮曉色遙林卷宿煙晨霞稍含景落月漸虧弦迴塘響  
歌吹極浦望旌旃方陪覲東后登封禪肅然

汴水早發應令

夏山朝萬國軒庭會百神成功疇與讓盛德今為隣區  
宇屬平一庶類仰陶鈞鑾蹕臨河濟裴冕肅柴禋啓行  
分七萃備物象三辰祁祁亘原隰濟濟咸縉紳陽谷升  
朝景青丘發早春袞衣敷帝則分器敘彝倫臨淄成誦

美河間雅樂陳薰風穆已被茂實久愈新

秋日贈王中舍

秦關望吳苑渭渙去江濱天漢星躔絕山川地角分百  
年變朝市千里異風雲雙駕難可贈別鶴不相聞忽值  
從遊士玳簪光素履歡言悅鄭郊雪泣悲燕市契濶論  
談笑殷勤訪生死思君在一方無由同四美尺素乃云  
披投瓊慰久離雲開縹錦散霞照綠緹披相思歎河廣  
相望阻天垂贈言方杜若握手代萱枝伊昔風期早金

蘭信為寶去來金馬門留連關雞道驚嶺訪三禪商山  
追四皓勝地俱遊息披文遞論討虛薄忝官聯喬木遂  
同遷濯纓升博望閣

一作飛

步入崇賢高軒照流水長劍

聳秋蓮南風忽不競東海遂成田喧喧狹斜路隱隱平  
陵樹鳳闕曖西臨星橋耿南注五方多異俗四海皆行  
路士衡嗟苦辛德璉傷流寓鞏洛重行行寓目盡傷情  
太行臨北絳函谷拒西京雀書圖久滅龍文鼎遂輕凌  
雲餘構盡濛汜曲池傾

一作平

徘徊殊未極惆悵空雲纓

伊川忽會面留連展言宴東西一背飛翻然成異縣哀  
哉人道促痛矣嗟埋玉嵇生顧影琴裴子飄風燭摧茲  
激水意頓此浮雲足棄置勿重陳難終唯此曲漢陽趙  
元叔薛縣雍門周清文寧解病妙曲反增愁翳翳神逾  
伏懔懔歲方邁雙嶠飛暗雨八水凍寒流蘭枯芳草歇  
槐古憶前秋江干不可望徒此歎離憂

在南接北使

初學記  
作虞茂

會玉二嶠至瑞節三秦歸林蟬踈欲盡江鴈斷還飛墻

垣崇客館旌蓋入王畿共此敦封植方欣薦紵衣

初渡江

歛策暫迴首掩涕望江濱無復東南氣空隨西北雲

零落桐

零落三秋幹摧殘百尺柯空餘半心在生意漸無多

晚飛鳥

向日晚飛低飛飛未得棲當為歸林遠恒長侵夜啼

賦得戲燕俱宿

大厦初構與雲齊歸燕雙入正銜泥欲繞歌梁向舞閣  
偶為仙履往蘭闥千里爭飛會難並聊向吳宮比翼棲

虞茂

按隋史無虞茂虞世基字茂世此或世基詩也觀諸集多以二名互載亦可見

奉和望海

清蹕臨溟漲巨海望滔滔十洲雲霧遠三山波浪高長  
瀾疑浴日連島類奔濤神遊藐姑射睿藻冠風騷徒然  
雖觀海何以効涓毫

賦昆明池一物得織女石



隔河圖列宿清漢象昭回  
支機就鯨石拂鏡取池灰  
船疑海槎渡珠似客星來  
所恨雙蛾歛逢秋遂不開

賦得石

蜀門鬱遐阻燕碣遠參差  
獨標千丈峻共起百重危  
鏡峯含月魄蓋嶺逼雲枝  
徒然抱貞介填海共誰知

衡陽王齋閣奏妓

金溝低御道玉管正吟

一作迎

風拾翠天津上迴鸞鳥路

中鏡前看月近歌處覺塵空  
今宵織女見言是望仙宮

奉和幸太原輦上作應詔

唐巡光帝則夏務穡宸儀珠旗揚翼鳳玉獸儼丹螭流  
吹和春鳥交弄拂花枝

闕

入關

詩彙作庚  
信者非

隴雲低不散黃河咽復流關山多道里相接幾重愁

四時白紵歌二首

和煬  
帝

江都夏

長洲茂苑朝夕池映日含風結細綺坐當伏檻紅蓮披

雕軒洞戶青蘋吹輕幌芳煙鬱金馥綺簷花簾桃李枝  
蘭苕翡翠但相逐桂樹鴛鴦恒並宿

長安秋

露寒臺前曉露清昆明池水秋色明搖環動佩出層城  
鷗弦鳳管奏新聲上林蒲桃合縹緲甘泉奇樹上葱青  
玉人當歌理清曲娉好恩情斷還續

虞世南

字伯施世基弟也性沈靜寡欲文章婉綽慕徐陵陳至德初除西陽王友陳滅與兄世基

同入隋世基辭章清勁過世南而瞻博不及時人以方二陸大業中累至秘書郎煬帝雅愛其才然

疾峭正十年不徙後入唐累官秘書監○世  
南在唐有集今不備錄錄其作於隋者爾

奉和月夜觀星應令

早秋炎景暮初弦月彩新清風滌暑氣文露淨囂塵蕩  
霧銷輕縠鮮雲卷夕鱗休光灼前耀瑞彩接重輪緣情  
摛聖藻並作命徐陳宿草誠渝濫吹噓偶縉紳天文豈  
易述徒知仰北辰

奉和至壽春應令

英華作奉和  
長春宮應令

瑤山盛風樂南巡務逸遊如何事巡撫民瘼諒斯求文

鶴揚輕蓋蒼龍飾桂舟  
汎沫紫沙嶼寒澌擁急流  
路指八仙館途經百尺樓  
眷言昔遊踐迴駕且淹留  
後車喧鳳吹前旌映彩旒  
龍驂駐六馬飛閣上三休  
調諧金石奏歡洽羽觴浮  
天文徒可仰何以廁琳球

追從鑾輿夕頓戲下應令

重輪依紫極前耀奉丹霄  
天經戀宸扆帝命扈仙鑣  
乘星開鶴禁帶月下虹橋  
銀書含曉色金輅轉晨飈  
霧徹軒營近塵暗斗城遙  
蓮花分秀萼竹箭下驚潮  
撫已慙

龍幹承恩集鳳條瑶山盛風樂抽簡薦徒謠

奉和幸江都應詔

英華作虞世南藝文作世基或誤也世基別有一首

南國行周化稽山秘夏圖百王豈殊軌千載協前謨肆

覲遵時豫順動悅來蘇安流進玉舳

一作畫舸

戒道翼金吾

龍旂煥辰象鳳吹溢川塗封唐昔敷錫分陝被荆吳沐

道咸知讓慕義久成都冬律初飛管陽鳥正銜蘆嚴飈

肅林薄暖景澹江湖鴻私浹幽遠厚澤潤凋枯虞琴起

歌詠漢筑動巴歛多幸霑行葦無庸類散樗

奉和獻歲讌宮臣

履端初起節長苑命高筵肆夏喧金奏重潤響朱絃春  
光催柳色日彩泛槐煙微臣同濫吹謬得仰鈞天

奉和出潁至淮應令

良晨喜利涉解纜入淮潯寒流泛鷁首霜吹響哀吟潛  
鱗波裏躍水鳥浪前沈邦溝非復遠悵望悅宸襟

應詔嘲司花女

隋遺錄曰煬帝幸江都洛陽人獻合蒂迎輦花帝  
令御車女袁寶兒持之號司花女時詔世南草敕

於帝側竇兒注視久之帝曰昔飛燕可掌上舞今得竇兒方昭前事然多愁態今注目於卿卿可便嘲之世南為絕句曰

學畫鴉黃半未成垂肩顰袖太憨生緣憨却得君王惜  
長把花枝傍輦行

虞綽

字士裕會稽餘姚人仕陳為太學博士大業初轉秘書學士遷著作郎常居禁中以文翰待詔

後坐與楊玄感交往徙於邊亡匿為吏所執被刑

於婺州被囚

北史本傳曰綽被徙至長安而亡潛度變姓名遊東陽抵信安令辛大德大德舍之歲餘綽與人爭



田相訟有識綽者  
而告竟為吏所執

窮達雖有命逋逃誠負累背恩已偷生臨危未能死得

初學  
作待

罪既不測中心悵無已厚顏羞朋友囚心愧妻子

聖日始東扶徂年迫西汜方違盛明代永向幽泉裏况

當此春節物候驚田里桃蹊日影亂柳迎秋

疑作  
和

風起

動植皆順性嗟余獨淪耻投筆不重陳此情寄知己

蔡允恭

荊州江陵人工為詩仕隋起居  
舍人隋亡入唐官至太子洗馬

奉和出賴至淮應令

久倦川塗曲忽此望淮折波長泛淼淼眺迥情依依稍  
覺金烏轉漸見錦帆稀欲知仁化洽謳歌滿路歸

蕭綜

字溫文父歸梁王譽之子譽請魏師平江陵遂稱帝於江陵傳歸及綜嗣位二歲入朝於隋被

紹賜爵莒國公煬帝即位改封梁公後被廢卒

### 奉和月夜觀星

陽精已南陸大曜始西流夕風淒淒謝暑夜氣應新秋重  
門月已映巖城漏漸脩臨風出累榭度月蔽層樓靈河  
隔神女仙轡動星牛玉衡指棟落瑤光對幌留徒知仰

閭闔乘槎未有由

袁慶

按隋書樂志有袁慶隆者大業時為秘書郎煬帝命與柳顧言等典樂事疑即此也

奉和月夜觀星

六龍出匿影顧兔始馳光戎井傳宵漏

文選刻漏銘徵宮戎井

山

庭引夕涼宸居多勝託間步出林堂爛爛星芒動耿耿

清河長青道移天駟北極轉文昌喬枝猶隱畢絕嶺半

侵張仰觀留玉裕

陸機宣猷堂詩天姿玉裕

睿作動金相無庸徒抱

寂何以繼連章



古詩紀卷一百三十四

欽定四庫全書

古詩紀卷一百三十五

明 馮惟訥 撰

隋第六

諸葛穎

字漢丹陽建康人起家梁邵陵王參軍侯景之亂奔齊待詔文林館遷太子舍人入隋晉

王廣引為參軍及王即帝位遷著作郎甚見親倖從駕北巡卒於道

奉和月夜觀星

竄窳神居遠蕭條更漏深薄煙淨遙色高樹肅清陰星  
月滿茲夜燦爛還相臨連珠欲東上團扇漸西沈澄水

含斜漢脩樹隱橫參時聞送籌析屢見繞枝禽聖情記  
餘事振玉復鳴金

奉和方山靈巖寺應教

名山鎮江海梵宇駕風煙畫栢臨松蓋鑿牖對峯蓮雷  
出階基下雲歸梁棟前靈光辨晝夜輕衣數劫年一陪  
香作食長用福為田

奉和出潁至淮應令

一作  
應詔

涉潁倦紆迴浮淮欣迥直遙村含水氣遠浦澄天色靈

濤稍欲近仙巖行可識玄覽屬睿辭風雲有餘力

奉和通衢建燈應教

芳衢澄夜景法炬爛參差逐輪時徙燄桃花生落枝飛  
煙繞定室浮光映瑤池重閣登臨罷歌管乘空移

賦得微雨東來應教

陶淵明讀山海經詩微  
雨從東來好風與之俱

微雨閣東峯散漫洒長松澗滿新流濁山霑積翠濃風  
起還吹燕雲來本送龍登年隨玉燭名山定可封



春江花月夜

和煬帝

張帆渡柳浦結纜隱梅洲月色含江樹花影覆船樓

孫萬壽

字仙期信都武強人在齊奉朝請隋高祖受禪滕穆王引為文學坐事配防江南後歸鄉

里為齊王文學終於大理司直

遠戍江南

一作城

寄京邑親友

隋書本傳曰萬壽為滕穆王文學坐衣冠不整配防江南宇文述召典軍書鬱鬱不得志為五言詩寄京邑知友盛為當時之所吟誦

賈誼長沙國屈平

一作原

湘水濱江南瘴癘地從來多逐

臣粵余非巧宦少小拙謀身欲飛無假翼思鳴不值晨

如何

一作誰言

載筆士翻作負戈人飄飄如木偶棄置同芻

狗失路乃西浮非狂亦東走晚歲出函關方春度京口

石城臨虎據天津望牛斗牛斗盛妖氛梟獍已成羣郤

超初入幕王粲始從軍裹糧楚山際披甲吳江濱吳江

一浩蕩楚山何糾紛驚波上濺日喬木下臨雲繫越恒

資辯喻蜀幾飛文魯連唯救患吾彥不爭勲

英華作唐彬不競勤

註云晉書唐彬知潁皓將至遲留以示不競今隋書作吾彥不爭勲按吾彥乃降將無不爭功事未詳

羈

遊歲月久歸思常搔首非關不樹萱  
豈為無杯酒數載辭鄉縣三秋別親友  
壯志後風雲衰鬢先蒲柳心緒亂如絲  
空懷疇昔時昔時遊帝里弱歲逢知己  
旅食南館中飛蓋西園裏河間本好書  
東平唯愛士英辯接天人清言洞名理

一作歡娛  
承帝子

鳳池時寓直麟閣常遊止勝地

盛賓僚麗景相携招舟汎昆明水騎指渭津橋  
祓除臨灞岸供帳出東郊宜城醕始熟陽翟曲  
新調繞樹烏啼夜雉麥雉飛朝細塵梁下落長  
袖掌中嬌懽娛三樂至

一作流連  
三雅至

懷抱百憂銷夢想猶如昨尋思久寂寥一朝

牽世網萬里逐波潮迴輪常自轉懸旆不堪搖登高視

一作山  
州想

衿帶鄉關白雲外迴首望孤城愁人益不平華

亭宵鶴唳幽

一作函

谷早鶯鳴斷絕心難續惝恍覓屢驚

羣紀通家好

一作契

鄒魯故鄉情若

一作倘

值南飛鴈時能

一作希

訪死生

篇內凡言一作皆出文苑英華

### 答楊世子

太華五千仞長河九萬里山川每蘊玉人物多君子丞

相朝所宗太尉國之紀若人惟傑出濟世承餘祉趨庭  
遵教義博物無文史奇聲振宛洛雅論窮名理伊余苦  
疲病寂寞罕賓遊不言驅駟馬於焉訪一丘縞紵始云  
贈膠漆乃相投伏枕空長想驂蹇遂無由忽此承來翰  
華藻殊輝煥雖則濫吹噓可以蠲憂歎懷袖終不滅掌  
握方留翫和風初應律山鶯已復新芳菲徒自好節物  
不關人勞歌雖有曲無以報陽春

別贈

昔我遊雲閣及爾謬同官高步參師友長裾接綺紈索  
居方十載相思勞萬端不言今夕遇得盡故人歡酒隨  
彭澤至琴即武城彈高齋屏餘熱珍簟宿輕寒葉落霜  
威重蕙疎月色殘將歸動離恨彌傷行路難

和張丞奉詔於江都望京口

回首觀濤處極望滄海湄流波去無限喬木不勝悲蓬  
萊雖已變池塘尚所思歸飛路窮此悵望情難持吾生  
乃民季疇日佐藩維尚想西園夕猶懷北固時城邑纔

辨處風煙忽何之  
跂予未能已  
顧歎空遲遲

和周記室遊舊京

詩苑類選作  
周若水者非

大夫愍周廟  
王子泣殷墟  
自然心斷絕  
何關繫  
慘舒僕  
本漳濱士  
舊國亦淪胥  
紫陌風塵起  
青壇冠蓋踈  
臺留子建賦  
宮落仲將書  
譙周自題柱  
商容誰表閭  
聞君懷古曲  
同病亦連如  
方知周處歎  
前後信非虛

行經舊國

蕭條金闕遠  
悵望霸心愁  
舊邸成三逕  
故園餘一丘  
庭

引田家客池泛野人舟日斜山氣冷風近樹聲秋弱年  
陪宴喜方茲更獻酌脩竹慚詞賦叢桂且淹留自忝無  
員職空貽不調羞武騎非吾好還思江漢遊

庭前枯樹

英華作孫萬壽  
庾信集誤載

當時金谷裏昔日平陵東布葉俱承露開花共待風搖  
落一如此容華遂不同庭前生意盡井上蠹心空匠者  
無勞顧擁腫難為功

早發揚州還望鄉邑



鄉關不再見，悵望窮此晨。  
山煙蔽鍾阜，水霧隱江津。  
洲渚歛寒色，杜若變芳春。  
無復歸飛羽，空悲沙塞塵。

東歸在路率爾成詠

學宦兩無成，歸心自不平。  
故鄉尚千里，山秋猿夜鳴。  
人愁慘雲色，客意慣風聲。  
羈恨雖多緒，俱是一傷情。

王春

字元恭，琅邪臨沂人。筠之孫也。博學多通，少有盛名。於江左仕陳、歷太子洗馬中舍人。陳亡，與

胄俱為學士。煬帝即位，授秘書郎。

七夕二首

天河橫欲曉鳳駕儼應飛落月移粧鏡浮雲動別衣  
權逐今宵盡愁隨還路歸猶將宿昔淚更上去年機  
終年恒弄杼今夕始停梭卻鏡看斜月移車渡淺河長  
裙動星珮輕帳揜雲羅舊愁雖暫止新愁還復多

王胄

字承基眷之弟少有逸才仕陳起家鄱陽王法曹參軍太子舍人東陽王文學陳滅晉王引為

學士大業初為著作佐郎楊玄感敗胄坐交遊與虞綽俱徙邊胄亡匿江左為吏所捕坐誅

白馬篇

白馬黃金鞍

一作鞭

蹀躞柳城前問此何鄉客長安惡少

年結髮從戎事馳名振朔邊良弓控繁弱利劍揮龍泉

一作淵披林扼彫虎仰手接飛鳶前年破沙漠昔歲取祁

連折衝摧右校塞旗殪左賢昆彌還謝力

昆樂府作虎左傳狄虎彌

所謂有力如虎者也慶忌本推僇海外平遐險來庭識負寨三韓

勞薄伐六事指幽燕良家選河右猛將征西山浮雲屯

羽騎蔽日引長旃自矜有餘勇應募忽爭先王師已得

雋夷首失求

一作諒失

全鼓行狗玉檢乘勝蕩朝鮮志勇期

功立寧憚微軀捐不羨山河賞誰希竹素傳

西園遊上才

樂府無名  
在王冑後

沈約詠月詩曰高樓  
切思婦西園遊上才

西園遊上才清夜可徘徊月桂臨樽上山雲影益來飛  
花隨燭度踈葉向帷開當軒顧應阮還覺賤鄒枚

棗下何纂纂二首

柳黃知節變草綠識春歸複道含雲影重簷照日輝  
御柳長條翠宮槐細葉開還得聞春曲便逐鳥聲來

燉煌樂二首

長途望無已高山斷還續意欲此念時氣絕不成曲  
極目眺脩塗平原忽超遠心期在何處望望崦嵫晚

紀遼東二首

遼東沮水事龔行俯拾信神兵欲知振旅旋歸樂為聽  
凱歌聲十乘元戎纔渡遼扶滅已冰消詎似百萬臨江  
水按轡空迴鑣

天威電邁舉朝鮮信次即言旋還笑魏家司馬懿迢迢  
用一年鳴鑾詔蹕發淆潼合爵及疇庸何必豐沛多相

識比屋降堯封

奉和賜酺

詩彙作煬  
帝若非

隋書本傳曰煬帝自東都還京師賜天下大酺四  
日為五言詩詔羣官詩成者奏之帝覽胄詩而善  
之謂侍臣曰氣高致遠歸之於胄詞清體潤其在  
世基意密理新惟庾自直過此者未可以言詩也  
帝所有篇什多令繼和與虞綽齊名同志  
友善于時後進之士咸以二人為準的

河洛稱朝市峻函實輿區周營曲阜作漢建奉春謨大  
君苞二代皇居盛兩都招搖正東指天駟迺西驅展軫  
齊玉軼式道耀金吾千門駐罕畢四達儼車徒是節春

之暮神臯華實敷皇情感時物睿思屬粉榆詔問百年  
老恩隆五日酺小人荷鎔鑄何由答大鑪

奉和悲秋應令

秋天擬文學秋水擅莊蒙草濕蕪葭露波卷洞庭風便  
坐翻桑葉長坂歇蘭聚簷喧猶有燕陂靜未來鴻蟬噪  
聞疑斷池清映似空劉安悲落木曹植歎征蓬重明豈  
凝滯無累在淵冲隨時四序合應物五情同發言形惻  
隱睿作挺神功下材均朽木何以慕彫蟲

文苑英華註  
曰此篇前五

韻見初學記作蕭慤秋日詩文苑一百五十八卷復云  
庾信作而一百七十九卷乃十韻共題王胄作觀其辭  
意只是一篇當以十韻為正

言反江陽寓目灞涘贈易州陸司馬

遊人賣藥罷徐步反江干行吟灞陵岸迴首望長安晨  
華照城闕參差復鬱盤千門含日麗萬雉映霞丹雲開  
承露掌吹動相風竿遊童輕薄少鮮服鷄鷄冠花開傳  
粉晏塵起副車韓屢投雙飛劍曹操兩色丸挂玉要遊  
女彈珠落矯翰信美非吾樂何事久盤桓欲動南登詠



金  
卷一百三十五  
還謠北上難眷言思舊友徂遠路漫漫燕陲望楚服天  
際與雲端棹發吳濤上荆歌易水寒十年阻風月萬里  
別金蘭心期竟何許懷抱日摧殘容華冉冉謝衣帶朝  
朝寬盛憲寧延壽劉琨自少歡宿昔均取捨同波豈異  
瀾贈言不盡意擲筆起長歎

酬陸常侍

相知四十年別離萬餘里君留五湖曲余去三河溪寒  
松君後凋溺灰余僅死何言西北雲復覲東南美深交

不忘故飛觴敦宴喜贈藻發中情奇音邁流徵追惟中  
歲日於斯同想止思之宛如昨候馬逾二紀疇昔多朋  
好一旦埋蒿里無人莫已知有慟傷知己把臂還相泣  
歸然吾與子霑襟行自念哀哉亦已矣吾歸在漆園著  
書試詞一作經理勞息乃殊致存亡寧異軌大路不能遵  
咄哉情可鄙

答賀屬

外黃初邸客蜀郡晚琴聲本欲從張耳何曾說馬卿定

知遊道日非是第如行高文擬雜珮善謔間瑤瓊前書  
言家室末敘挂簪纓問仁寧伐國揚波豈亂清聞有陽

臺客

一作曲

常留入夢情無為

一作由

嗟獨割空引助庖名

卧疾閩越述淨名意

并序

余卧疾閩海彌留旬朔善友顒法師勸余以淨名妙  
典調伏身心力疾粗陳其意敬簡法師云爾

客行萬餘里眇然滄海上五嶺常炎鬱百越多山瘴兼  
以勞形神遂此嬰疲恙桐雷邈已遠砭石良難訪抱影

私自憐霑襟獨惆悵毗城有長者生平夙所尚復藉大  
因緣勉以深迴向心路資調伏於焉念實相水沫本難  
摩訶城空有狀是生非至理是我皆虛妄求之不可得  
誰其受業障信矣大醫王茲力誠難量

別周記室

五里徘徊鶴三聲斷絕猿何言俱失路相對泣離樽別  
意悽無已當歌寂不喧貧交欲有贈掩涕竟無言

賦得鴈送周員外戍嶺表

旅鴈別衡陽天寒關路長行斷由驚箭聲嘶為犯霜  
惟繳無人憫能鳴反自傷何如侶汎汎刷羽戲方塘

為寒牀婦贈夫

月淨閨偏冷更深夜轉長霜紈猶掩扇露縠未飄香  
解帶慙連理引被愧鴛鴦誰能未相識還為守空牀

雨晴

初晴物候涼夕景照山莊殘虹低飲澗新溜上侵塘  
風度蟬聲遠雲開鴈路長

闕



古詩紀卷一百三十五